

ÑAXAN BA JUN TSA' BA I TS'IJBUBU PABLO CHA'AN TIMOTEO

Pablo mi' ts'ijbuben jun Timoteo

1 ¹ Joñon Pablojon. Yajcɔbilon ba ajsubt'añon ñumel i cha'an ba Jesucristo. Ti' xiq'uiyon majlel Dios Ajcotyaya lac cha'an yic'ot lac Yum Jesucristo. Jiñlach mu' ba i cotañaonla. ² Mic ts'ijbubeñet ili jun Timoteo, che' bajche' yoque calobilet cha'an ti jini mu' ba lac ch'ujbin. Com ajniquet ti yutslel i pusic'al Dios yic'ot ti' p'untyaya yic'ot ti' ñlach'tyalel tyalem ba ti Dios lac Tyat yic'ot ti lac Yum Cristo Jesús.

T'an cha'an jini mach'ɔ wen ba cantisa

³ Tij c'ajtibeyet ti wocol t'an cha'an cɔlyequet ya' ti lum Efeso ba i c'aba' che' ñac tsajniyon ti lum tyac ya' ti pañimil Macedonia ba i c'aba'. Tic xiq'uiyet a tic'ob cha'tiquil uxtiquil cha'an mach i pɔsob mach ba wen ba cantisa.

⁴ Mach yom i chɔc ña'tyañob jini mach ba melel oño't'anix ba t'an. Mach yom i chɔc c'ajtisana i c'aba' tyac ti jujuntiquil i yumob ti ñoj oniyix. Mach'ɔ ba'an i yujtibal jini t'an tyac yubil. Jini t'an muc' jach i tyeche' mach'ɔ wen ba t'an.

Mach'an mi' cotañaonla lac ch'ujbin tsa' ba i yɔq'ueyonla ti lac wenta Dios.

⁵ Mic xic'ob cha'an yom i c'uxbiñob i ba. Chancol lac yoque cha'len p'untyaya che' sac lac pusic'al che' ma'ix bajche' yɔla lac pusic'al che' mi lac yoque ch'ujbin Dios.

⁶ An jini tsa' ba i ca ch'ujbi. Pero tsa'ix i cha' cɔyɔyob. Ti queji i tyechob yamba t'an mach'ɔ ba'an i c'ajñibal.

⁷ Yomob i lolon otsan i ba ti ajcantisajob ti i mandar Dios pero mach'an mi' isujmben mi jinic yujil bajche' chancol ti cantisa. Mi' lolon ña'tyan jini jach yujilob isujm.

⁸ La cujil isujm c'ajñibalach i mandar Dios che' mi ch'ujbintyel che' bajche' yom Dios.

⁹ Ña'tyɔbil lac cha'an mach'an mandar cha'an jini wen ba mi' cha'len. Pero an jach mandar cha'an jini mach'ɔ wen mi' cha'leñob. I cha'an jini mach'ɔ ba'an mi' ch'ujbiben i mandar Dios. I cha'an jini ñunt'año' ba. Jini mandar i cha'an jini mach'ɔ ba'an mi' ch'ujutisan Dios. I cha'an xmulilo' ba yic'ot i cha'an jini mach'ɔ ba'an mi' q'uelob ti ñuc Dios yic'ot mach'ɔ yom i q'uel i ch'ujbintyel Dios. Jini mandar i cha'an jini mu' ba i tsansan i tyat i ña'. I cha'añlach pejtyel ajtsansajob.

¹⁰ Jini mandar i cha'an jini am ba t'an yic'ot yamba x'ixic yamba winic, che' alob an t'an yic'ot x'alal che' mach i ñoxi'alic mi yijñamic. I cha'an jini winicob mu' ba i laja pejcañob i ba. I cha'an jini mu' ba i xujch'iñob majlel quixtyañu. I cha'an jini xlotyob. I cha'an jini mu' ba i lolon al melelach q'uelon Dios, che'ob. Jini mandar i cha'an je'el pejtyel am ba ti' contra jini wen ba cantisa.

¹¹ Ili wen ba cantisa junlajal yic'ot jini ñoj wen ba t'an cha'an laj cotyantyel tyalem ti ñoj ñuc ba Dios. Ili wen ba cantisa ti aq'uentiyon tic wenta.

**Wocox i yɔla cha'an laj
cotyantyel ti Dios**

¹² Mic suben lac Yum Jesucristo wocox i yɔla cha'an jini ti yɔq'ueyon c p'ɔtyalel ti subt'an ñumel. Ti' q'ueyeyon ti xuc'ul. Jin cha'an ti yac'on c toñel.

¹³ Tsa'ix i yajcɔyon aunque ti ñaxan tij contraji tic t'an. Tic wajle. Tic tyac'la jini chancol ba i ch'ujbin Dios. Pero Dios ti' p'untyayon che' ñac max tyo ba'an tic ch'ujbi che' ñac max tyo ba'an tic ña'tya chɔ ba tic cha'le.

¹⁴ Jin cha'an ñoj cabal ti ajni i yutslel lac Yum quic'ot. Ti queji c ch'ujbin Dios. Ti queji c p'untyañob che' bajche' mi la

caq'uentyel lac cha'len che' mi laj cajñel ti Cristo Jesús.

15 Jiñlach yoque isujm ba ili t'an. Ti pejtyel yom i lu' ch'ujbin cha'an ti tyali Cristo Jesús wa' ti mulawil cha'an i cotyan xmulilob. Joñon jini más simaroñon ba mi cubin bajche' pejtyel yaño' ba.

16 Jin cha'an ti' p'untyayon Dios cha'an mi ñaxan tisciyel ñoj ñuc ba lac p'untyantyel ti joñon che' jal ti' cuchu c mul Jesucristo. Cha'an majchical jach aunque ñuc ba xmulil mi yalq'uentyel i cuxtyalel mach'la yujil jilel che' mi' ch'ujbin.

17 Jin cha'an la' laj q'uel ti ñuc. La' tsictiyic i ñuclel ti bele' ora jini Yumal mach'la ba'an mi' c'ay i cha'len yumal, mach'la ba'an mi' sajtyel. Mach ch'ujbi la quilan jini cojach ba Dios am ba cabal i ña'tyalbal. Amén.

18 Calobil Timoteo, mic xiq'uet a cha'len wersa ti i toñel Dios che' chancol a wen ch'ujbin Dios che' ma'ix bajche' yala a pusic'al. Che' bajche' ti wa alayob che' ñac ti' tyajayetyob ti t'an jini la quermañujob cha'an che' yom Dios.

19 An jini tsa'ix ba i cha' satyayob i ba cha'an ti caj ti' ñusayob wen ba i tic'ol i pusic'al.

20 Che' ti ujtijob jini Himeneo yic'ot Alejandro. Ti cac'ayob ti' wenta Satanás cha'an mi' c'ayob i contrajin Dios ti' t'año.

Canntisa cha'an oración

2 1 Jini mu' ba quej c subeñet jiñlach más ñuc ba i c'ajñibal ba mandar. Mic xiq'uetla cha'an la' c'ajtibenla Dios cha'an ti' tyojlel pejtyel quixtyañu cha'an la' cha'len oración. Pejcabenla Dios cha'an cha ba jach yom i cha'año. Subenla Dios wocox i yala cha'an pejtyel quixtyañujob.

2 Yom mi la' cha'len oración cha'an ti pejtyel ñuc ba yumalob yic'ot pejtyel año' ba ye'tyel cha'an xuc'ul mi la cajñel, cha'an ñach'al añoñla cha'an mi la cac' lac ba ti Dios cha'an ajniconla ti wen cha'an uts'at mi' q'uelonla.

3 Como jiñlach wen. Jiñlach bajche' yom Dios Ajcotyaya lac cha'an che' mi lac tyajob ti oración.

4 Como Dios yom mi lu' tyajob i cotyantyel. Dios yom mi' lu' cambeño i sujmlal.

5 An juntiquil jach Dios. An je'el juntiquil jach ch'ujbi ba i ray tyalel quixtyañujob cha'an i yajñel yic'ot Dios. Jiñlach juntiquil winic Jesucristo ba i c'aba'.

6 Jesucristo ti yac'la i ba ti sajtyel cha'an i xot'ben i mul cha'an mi cotyantyelob pejtyel xmulilob. Jiñlach ti ajq'ui ti cajñel ti yorojlel wa yajcabil i cha'an Dios.

7 Ti otsantiyon ti ajpuct'an yic'ot ti yajcabil ba ajsubt'an ñumel cha'an mij cantisan i ch'ujbiño Dios ti wen ili melel ba t'an pejtyel quixtyañu mach'la israelobic. Mux c ch'ujbin Dios. Jin cha'an melelach c t'an. Mach'an muc'on ti lot.

8 Jin cha'an com mi' cha'leño oración winicob ba'ical ti pejtyel pañimil. Pero yom che' sac i pusic'al. Mach yom i cha'len mich'lel mi periyalic.

9 Che' je'el x'ixicob yom weñach mi' xojob i pislel. Mach yom ñoj wen ch'alal. I p'isol jach yom i ch'ajlib i pislel. Mach yom ñoj wen melel i jol. Mach yom i xoj ñoj cabal oro, mi tyunic lets ba i tyojol cha'an i ch'ajlib. Mach yom i lap che' ñoj lets ba i tyojol i pislel.

10 Pero yom i ch'allob i ba yubil cha'an ti wen ba i melbal. Jiñlach bajche' yom i cha'leño x'ixicob tsa' ba i ch'ujbiyob Dios.

11 X'ixicob yom i ñach'tyan i cantisantyel ti ñach'al. Yom ajnic ti pec'.

12 Joñon mach'an mi caq'ueño i cantisantyel winicob ti x'ixicob. Mach'an mi caq'ueño i yumiño x'ixicob. Ñach'al yom mi yajñelob.

13 Como Dios ñaxan ti yac'la Adán. Che' jini wi'il ti yac'la Eva.

14 Mach jinic ti lo'lonti Adán, pero jini ti lo'lonti 'ixic. Che' jini ti yotsa i mul.

15 I cha'año i cosan i yalobil x'ixicob, cha'an i cantisaño ti cha ba wen. Mi cotyantyel mi chancol i chac ch'ujbin Dios, mi chancol i chac cha'len

p'untyaya, mi chancol i chac ajñel ti wen yic'ot ti wen ba i ña'tyalbal.

Bajche' yom ajñel ajcñatyajob

3 ¹ Melelach ili t'an: Mi an majch yom i cñatyan jini ochemo' ba ti' t'an Dios yom i cha'len wen ba toñel.

² Jin cha'an jini am ba ye'tyel ti anciano mu' ba i cñatyan ochemo' ba ti' t'an Dios mach yom i yotsan i mul cha'an mach'an bajche' mi' tyajob ti t'an. Jiñlach yom juntiquil jach ba yijñam. Yom i bajñel wen tic' i pusic'al. Yom i yajñel ti wen ba i ña'tyalbal. Yom i mele' cha ba wen. Yom juntiquil mu' ba i mulan i yotsan i jula' ti yotyot. Yom juntiquil wen yujil ba cantisa mu' ba quej i yochel ti anciano.

³ Yom juntiquil mu' ba yochel ti ye'tyel ti anciano mach'la yujil q'uixnijel, mach'la ba'an mi' tyeche' periyal. Yom juntiquil mach'la ba'an mi' mulan i ganar tyaq'uin ti cha ba jach mach'la wen. Pero yom uts ba i pusic'al. Ñach'alix. Mach'an mi' tyeche' periyal. Mach'an mi' wen mulan tyaq'uin.

⁴ Yom ochic ti anciano juntiquil yujil ba wen ba xic'ojel cha'an jini año' ba ti yotyot. Yom ch'ujbibentic i t'an ti i yalobilob. Yom mi q'uejlel ti ñuc ti yalobilob.

⁵ Mi mach mej i xiq'ue' jini año' ba ti yotyot mach mej i q'uel i cha'año' ba Dios mu' ba i much'quiñob i ba .

⁶ Mach yom ochic cha'an ajcñatya ochemo' ba ti' t'an Dios tsijib ochem ba ti' t'an Dios ame i chan isan i ba ame mi yotsan i mul che' bajche' ti yotsa i mul xiba.

⁷ Che' je'el yom juntiquil mu' ba i q'uelob ti ñuc jini mach'la ba'an ochem ti' t'an Dios cha'an mach yac' i ba ti quisnil, ame yajlic ti yac xiba.

Bajche' yom ajñel diáconojob

⁸ Che' je'el yom ochic ti diácono winicob mu' ba i q'uejlel ti wen. Yom i ts'actisan i t'an. Mach yom jini mu' ba ti q'uixnijel, mi jinic mu' ba i mulan tyaq'uin mi cha ba yes mach ba wen ti ganar.

⁹ Yom i wen cñe' bajche' mi' wen ch'ujbin Dios. Yom ma'ix bajche' yala i pusic'al cha'an sac.

¹⁰ Yom wen q'uelelix ba. Mi weñach i melbal yom ochic ti diácono.

¹¹ Cha'ach x'ixicob je'el, yom mi yajñel ti wen. Mach yom i cha'len jop't'an. Yom i bajñel wen tic'ob i pusic'al. Yom mi yajñel ti xuc'ul ti pejtyel mu' ba i mele'.

¹² Jini diácono yom juntiquil jach ba yijñam. Yom juntiquil yujil ba i xiq'ue' ti wen yalobilob yic'ot pejtyel año' ba ti yotyot.

¹³ Como jini diáconojob wen ba mi' cha'len i toñel, mi q'uejlel ti ñuc. Mi quej i más tyaje' i ch'ejlel cha'an mi yale' bajche' mi' ch'ujbin Cristo Jesús.

Jini mu' ba lac ch'ujbin max tyo ba tsictiyem ti yamba ora

¹⁴ Com tyalel ti jula' ti seb ba'añet pero chancol tyo c ts'ijbubeñet ili jun

¹⁵ ame anic cha ba mi' jalitisañon j c'otyel ba'añet. Mic ts'ijbun iliyi cha'an a ña'tyan bajche' ma' wajñel a wic'ot i cha'año' ba jini cuxul ba Dios. Jini ocheme' ba mu ba i much'quiñob i ba jiñlach ba' chucul, ba' cñatyalbil yubil jini melel ba t'an.

¹⁶ Melelach ñoj ñuc i sujmllel bajche' mi lac ch'ujbin Dios:

Dios ti' pasa i ba ti' bac'tyal.

Ti' sube tyojach cha'an ti Ch'ujul ba i Ch'ujlel.

Ajtroñelob i cha'an Dios ch'oyolo' ba ti panchan ti' q'ueleyob.

Ti' sujbi ba'an quixtyañujob.

Ti ch'ujbibenti ti pejtyel mulawil.

Ti rajyi letsel ti panchan.

Jini mu' ba quej i cay i ch'ujbin Dios

4 ¹ Ñoj tsiquil mi yale' jini Ch'ujul ba i Ch'ujlel Dios, an jini mu' ba i yactyan i ch'ujbiñob che' tyalix jini yujtibalix ba q'uin tyac. Mi quej i ch'ujbiñob jini mu' ba i quej i lotiñob. Mi quej i ch'ujbin cantisa tyalem ti xibajob.

² Mi quej i ch'ujbin i cantisa i cha'an cha'chajpjax ba i pensal mu' ba ti lot.

Jini xlot ba ajcantisajob mach'an mi' cha'

pensalin i mul como ma'an bajche' yala i pusic'al como ñamalach ti lot. Senix yubil che' bajche' i tsoyil cha'an ti puli ti tsucu tyaq'uin.

3 Jini xlot ba ajcantisajob mi' tic'ob cha'an mach yom i p'aye' i yijñam winic. Mi' tic'ob je'el cha'an mach i c'uxob cha'chajp uxchajp cha ba tyac c'uxbil. Aunque Dios ti' lu' mele cha'an jini mu' ba i ch'ujbiñob cha'an jini mu' ba i ña'tyan i sujmllel. Mi' subeñob Dios wocox i yala. Mi' c'uxob.

4 Pejtyel tsa' ba i mele Dios lu' weñach. Mach'an cha ba yom ba mi lac p'aje'. Yom jach mi lac suben Dios wocox i yala che' mi laj c'uxe'.

5 Como lu' weñach cha'an cha'ach mi yale' Dios ti' t'an. Weñach cha'an ti lac sube Dios wocox i yala.

**Jini wen ba ajtoñel i cha'an ba
Jesucristo**

6 Mi cha'ach ma' cantisañob hermañujob wen ba ajtoñelet i cha'an Jesucristo che' jini. Mi quej a p'alyaliyel ti jini wen ba t'an tsa'ix ba a ch'ujbi yic'ot wen ba cantisa tsa'ix ba a tsacle.

7 Pero mach a ch'ujbin jini oño't'anix ba t'an, jini lolon jach ba. Mach i cha'anic Dios. Yom a wac' ti a pusic'al jini yom ba Dios.

8 An ts'itya' i c'ajnibal i cha'an lac bac'tyal che' mi lac tsats lac ba ti alas. Pero más an i c'ajnibal mi lac cha'len cha ba yom Dios. Como c'ajnibalach cha'an ili laj cuxtyalel wale iliyi yic'ot c'ajnibal cha'an jini tyal tyo ba ora mach'a yujil jilel.

9 Melelach ili t'an. Ti pejtyelelob yomach i lu' ch'ujbiñob.

10 Como tsa'ix lac ch'ujbi jini ñoj cuxul ba Dios. Jiñach Ajcotyaya i cha'an ti pejtyelelob. Yoque i cha'añach jini tsa' ba i ch'ujbiyob ti' pusic'al. Jin cha'an mi lac cha'len toñel. Mi lac ñusan lac wajlentyel.

11 Yom ma' tyumbiñob. Yom ma' wen cantisañob ti ili t'an.

12 Mach a wac' a ba ti mich'q'uelol cha'an alobet tyo. Pero yom a pas'eñob

jini ochemo' ba ti' t'an Dios bajche' yom i yajñelob. Pas'eñob bajche' ma' cha'len t'an bajche' ma' wajñel ti xuc'ul.

Pas'eñob bajche' ma' chac cha'len p'untyaya. Pas'eñob bajche' ma' mele' cha'ach bajche' yom Dios. Pas'eñob bajche' ma' wen ch'ujbin Dios yic'ot bajche' ma' wajñel ti sac.

13 Q'uelbeñob jini Ts'ijbubil ba i T'an Dios che' mi' much'quiñob i ba. Cha'len subt'an. Cantisañob ti' t'an Dios hermañujob jintyo mij c'otyel.

14 Mach yom ñajayel a cha'an a c'an a majtyan ti toñel Dios tsa' ba yad'uet Dios che' ñac ti yac'ayob i c'ab ti a jol jini ancianojob i cha'an ochemo' ba ti' t'an Dios cha'an che' yom Dios.

15 Chac mele jini a toñel ti jump'ej a pusic'al cha'an ti pejtyelelob ch'ujbiyach i q'uel bajche' chancol a más ajñel ti wen.

16 Canatyan a ba. Wen ña'tyan jini mu' ba a wale' ti cantisa. Chac ajñen ti xuc'ul. Mi cha'ach ma' mele', che' jini mi quej a cotyantyel. Mi quej i cotyantyel je'el jini mu' ba i ñach'tyabeñetyob a t'an.

**Bajche' yom ajñel yic'ot yaño' ba ochemo'
ba ti' t'an Dios**

5 1 Mach a wal'en ñoxobix ba, pero ma' tyumbin ti uts ba t'an che' bajche' a tyat. Che' je'el tyumbin alobob tyo ba che' bajche' a wijts'iñob.

2 Tyumbin ti uts ba t'an ñejep'ix ba 'ixicob che' bajche' a ña' yic'ot xc'alalob che' bajche' a wijts'iñob ti pejtyelel i saclel a pusic'al.

3 Cotyan meba' 'ixicob jini yoque i bajñel jach ba.

4 Pero mi añach i yalobil mi i yij, yom i ña'tyañob ñaxan i wentajach i cotyan i ña'. Che' jini mi' tyojob i bet yubil ti p'untyaya cha'an ti cosantiyob. Como cha'ach yom. Cha'ach wen mi' q'uel Dios.

5 Jini yoque meba' ba 'ixicob tsa' ba c'lyle ti bajñel mi' pijtyan i cotyantyel ti Dios ti cha ba yom. Mi' chac cha'len oración ti q'uinin ti ac'ballel.

6 Pero jini meba' 'ixic mu' ba i niq'ui cha'len che' bajche' bajñel yom, che' bajche' sajtyemix.

7 Xiq'uiyob ti ili mandar tyac cha'an mi yajñel ti wen cha'an mach'an bajche' mi tyajtyal ti t'an.

8 Pero mi an juntiquil mach'la ba'an mi' yalq'uen cha' ba yom i cha'an jini yoque i pi'alo' ba mi jinic jini año' ba ti yotyot, lolon jach mi yale' ochem ti' t'an Dios. Más bibajax jini quixtyañu che' bajche' jini max tyo ba ba'an mi' ch'ujbiñob Dios.

9 Yom jach mi la' wotsan ti jun i c'aba'ob meba' 'ixicob tsa'ix ba tyaja más ti sesenta i jabilel, tsa' ba ajni yic'ot juntiquil jach ba i ñoxi'al.

10 Yomach mi cajñel mi weñach ti' cha'le. Mi tsa'ach i cosa yalobilob. Machicach i cañal pero tsa'ach i yotsa ti yotyot. Ti peq'uisa i ba ti' pusic'al i cotyan jini ochemo' ba ti' t'an Dios. Mi tsa'ach i cotya jini año' ba i wocol mi tsa'ach i yal'la i ba ti pejtyel wen ba i cha'lival. Jiñob jach mi yochel i c'aba' ti jun jini.

11 Pero mach yom la' wotsan ti jun i c'aba' jini max tyo ba ti' tyaja sesenta i jabilel. Ame mi quej i cha' ñajatisan Cristo ti' pusic'al che' mi quej i cha' ña'tyan cha' ba bajñel yom i pusic'al. Cha' yomob i tyaj i ñoxi'al.

12 Che' jini mi' tyajob i mul como ti' ñusayob jini t'an bajche' ti' ñaxan subeyob Cristo cha'an i tsaclen Cristo ti pejtyel i pusic'al.

13 Che' je'el cabal mi ñumelob ti jula'. Mi quej i ts'ub'an. Mach jinic jach mi' ts'ub'an pero mi quejelob ti jop't'an. Mi quejel ti lot. Mi yale' jini mach'la ba'an ti' wenta i cha' ale'.

14 Jin cha'an com mi' cha' tyaj i ñoxi'al jini meba' 'ixic xc'alal tyo ba, cha'an anic i yalobilob. Com mi' q'uelob i yotyot. Che' jini mach me' i wajlentyelob jini ochemo' ba ti' t'an Dios ti cajob.

15 Como an jini meba' 'ixicob tsa' ba i ñajatisayob Dios. Chancol i cha' tsaclen Satanás.

16 Mi an juntiquil meba' 'ixic ti' tyojlelob tsa'ix ba i ch'ujbi Dios, yom i cotyañob.

Mach yom i cay ti' wenta yamba ochemo' ba ti' t'an Dios cha'an i cotyañob. Jini ochemo' ba ch'ujbiyach i cotyan jini meba'o' ba jini yoque yom ba i cotyantyelob.

17 Jini ancianojob tsa' ba i yal'la i ba ti subt'an yic'ot ti cantisa je'el yom i q'uejlel ti ñuc. Cha'yajlel yom i tyojtyal yubil. Cha'ach je'el pejtyel ancianojob mu' ba i cha'len i toñel ti wen.

18 Como jini Ts'ijbubil ba i T'an Dios mi yale': Mach a machben i ti' tyat wacax che' chancol i pechic tyec' loq'uel i wut trigo. Mi yale' je'el: Jini ajtoñel yom tyojlec. Che' mi yal ti Ts'ijbubil ba i T'an Dios.

19 Mach a ch'ujbin t'an ti' contra juntiquil anciano mi mach'an cha'tiquil uxtiquilob tsa' ba i yilayob.

20 Pero yom a tic'ob ti' tyojlel pejtyel jini ya' ba much'quibilob jini mu' ba i chac cha'leñob mulil. Che' jini mi quejelob i bac'ñan i yotsañob i mul yañob' ba je'el.

21 Mic xiq'uet cha'an a ch'ujbin ili mandar tyac como chancox i q'uelonla Dios yic'ot lac Yum Jesucristo yic'ot yajcabil ba ajtoñelob i cha'an ba Dios año' ba ti panchan. Mach yom parte ma' tic'ob. Junlajalach yom ma' q'uelob.

22 Mach a wa' otsan ti saj ora jach juntiquil cha'an mi yochel ti ye'tyel cha'an ochemo' ba ti' t'an Dios. Como mi mach wen mi' cha'len che' bajche' a mulach yubil. Chac ajñen ti wen.

23 Mach jinic jach ja' yom a jape' pero yom a jape' ts'itya' vino je'el. Como cabal i chamel a ñac'.

24 An quixtyañujob ñoj tsiquilach che' an i mul che' max tyo ti rajyi ti melojel. Pero yañob' ba max tyo tsiquil mi an i mul jintyo ti wi'il tyo mi tsictiyel.

25 Cha'ach je'el ñoj tsiquilach jini wen ba i cha'livalob aunque max tyo ti ora mi tsictiyel pero mach'an mucul mi quej i claytal.

6 1 Yom i q'uel ti ñuc i yum jini lolon yajtoñel jach ba cha'an mach wajlentic Dios mi i t'anic Dios mu' ba laj can ti cantisa.

2 Mi ochem ti' t'an Dios i yum jini ajtoñel je'el más yom i q'uel ti ñuc i yum, como

hermañujach ti jini mu' ba lac ch'ujbin.
 Pero más tyo yom i cotyan cha'an ochem
 ti' t'an Dios je'el. Como lajalach
 p'untyabil ba hermañu chancol ba i
 cotyan. Cantisañob ili t'an. Xic'beñob
 cha'an lu' ch'ujbibentic.

**C'ajacña i voj jini mu' ba i
 ch'ujbin Dios**

³ Mi an majch mi' cantisan ti lot ba
 cantisa mach'la lajal yic'ot jini wen ba
 cantisa i cha'an ba lac Yum Jesucristo
 yic'ot jini mu' ba laj cantisañob
⁴ chancol jach i lolon bajñel chan isan i
 ba. Mach'an cha ba yujil. Wersa yom
 jach i lolon cha'len t'an cha'an i sujmllel
 t'an tyac. Muc' jach i tyeche' cabal t'an.
 Como jini t'an tyac muc' jach ba i
 tyejchben i mich'q'uelol cha ba tyac i
 cha'año' ba yaño' ba yic'ot periyal. Mi'
 wajleñob i ba. Mach'an mi' ch'ujbibeñob
 i ba i t'an.
⁵ Mi' tyeche cabal periyal mach'la ba'an
 i yujtibal yubil. Como mach wen
 bajche' mi' ña'tyañob. Mach ch'ujbi i
 cañob i sujmllel. Mi' lolon ña'tyan i
 ch'ujbibentyel Dios junchajbach bajche'
 ch'ujbi i ganarin tyaq'uin. Loq'uenix
 ba'añob jini mu' ba i cha'leñob che'
 bajche' jini.
⁶ Tsiquil ricolach jini mu' ba i ch'ujbin
 Dios pero che' jasalach am ba i cha'an mi
 yubin.
⁷ Como mach'an cha ba ti lac ch'ama
 tyalel wa' ti ili mulawil. Che' je'el
 mach'an cha ba mi quej lac ch'ame'
 majlel.
⁸ Pero mi añlach la cuch'el, lac pislel
 uts'atyach añonla.
⁹ Pero jini yom ba yajñel ti más chumul
 mi chac ilpusic'lentyel. Mi chujquel ti yac
 yubil cha'an ti lolon mulantyelel cha ba
 jach mu' ba i yasan. Mi yalq'uen i ñusan
 wocol. Mi quej i más ajñel ti simaronlel.
 Mi quej i yalq'uen i xot'mulil.
¹⁰ Como i mulantyelel tyaq'uin mi tyeche
 pejtylel simaronlel. An jini tsa'ix ba i
 clyayob i ch'ujbin Dios cha'an yomob i
 tyajob cabal i tyaq'uin. Tsa'ix i yal'ayob i
 ba i yilan cabal wocol ti' caj.

**Weñach mi yajñel jini mu' ba i
 ch'ujbin Dios**

¹¹ Pero jatyet i winiquet Dios, ma' ma'
 wotsan a ba ti pejtylel jini mulil tyac.
 Tsaclen cha ba wen. Cha'len cha ba yom
 Dios. Wen ch'ujbin. Cha'len p'untyaya.
 Cuchu wocol ti uts'at. Ajñen ti pec'.
¹² Cha'len wersa a wen ch'ujbin. Chac
 chucu yubil jini a cuxtyalel mach'la yujil
 jilel. Ti yajcayet Dios cha'an a tyaj a
 cuxtyalel mach'la yujil jilel. Tsa'ix a
 tsictisa ti' tyojelob cabalob bajche' ma'
 wen ch'ujbin Dios.
¹³ Wale mic xiq'uet como mi' q'uelonla
 Dios mu' ba i yalq'uen i cuxtyalel pejtylel
 cha ba yes an yic'ot Jesucristo tsa' ba i
 wen subu i ba ti Yalobil Dios ti' wut
 Poncio Pilato.
¹⁴ Mic xiq'uet a wen ch'ujbiben c'ala
 jintyo mi cha' tyalel lac Yum Jesucristo
 jini mu' ba c subeñet. Mach a q'uextyan
 ili mandar cha'an mach'an bajche'
 ch'ujbi i tyajetyob ti t'an.
¹⁵ Tsa'ix i wa yajca i yorojlel Dios che'
 mi quej i tyalel Jesús. Como jiñach jini
 cojach ba jini ñoj uts'at ba Dios. Jiñach
 jini ñoj p'atyal ba Dios. Jiñach i Rey ti
 pejtylel reyob. Jiñach i Yum ti pejtylel
 yumalob.
¹⁶ Jin jach i bajñel Dios mach ch'ujbi
 sajtic. Mi yajñel ti' saclel. Mach'la ba'an
 majchqui ch'ujbi i lac'ben i saclel.
 Mach'an majch ch'ajbi i yilan. I
 cha'añlach pejtylel i ñuclel yic'ot i
 p'atyalel cha'an ti pejtyelel ora. Amén.
¹⁷ Xiq'uiyob jini año' ba cabal cha ba an
 i cha'an wa' ti mulawil cha'an mach i
 chan isan i ba. Mach yom i lolon ña'tyan
 uts'at an cha'an ti caj cabal i tyaq'uin.
 Como mach'an mi jalejel. Pero yomach i
 ña'tyañob i yajñel ti wen che' mi'
 ch'ujbin Dios. Jiñach jini cuxul ba mu' ba
 i yalq'ueñonla i yonlel pejtylel cha ba yom
 lac cha'an.
¹⁸ Xiq'uiyob i melob pejtylel cha ba wen.
 La' i tyajob yoque i ricoljelel cha'an ti
 cabal wen ba i cha'libal. Yom tyalem ti'
 pusic'al i yalq'ueñob i majtyan. Yom i
 cotyañob yaño' ba je'el.

19 Che' jini añach cabal cha ba lotyol i cha'an yubil cha'an jini tyal tyo ba q'uin. Mi' chac chuque' yubil je'el i cuxtyalel mach'Λ yujil jilel.

Cojix ba xic'oñel cha'an Timoteo

20 Timoteo, cañatyan pejtyel jini t'an tsa' ba otsanti ti a wenta. Mach a ñach'tyan

cabal t'an tyac i cha'an jach ba mulawil. Mach'an i c'ajñibal. Mach a ñach'tyan jini mu' ba lolon ale' wen yujil i ña'tyalyel mi yal, pero mach melelic an i ña'tyabal. 21 An jini chancol ba i ch'ujbin jini mu' ba i lolon yale' wen yujilob. Jin cha'an tsa'ix i caya i ch'ujbin Dios. La' ajnic i yutslel Dios a wic'ot. Amén.